

lis Gnovis

■ **UDIN.** Economie agrarie tra lûs e scûr

Cun Trentin, Sûd Tirol e Venit, il Friûl (-3%) e je la regjon dulà che il valôr de produzion agricule al è calât di plui, vie pal 2019. Al è un dai dâts plui preocupants proferîts tal «Annuario dell'Agricoltura italiana 2019» che il Consei pe ricercje in agriculture e pe analisi da l'Economie agrarie al à presentât ai 22 di Zenâr. Il scandai, rivât a la LXXIII edizion, al pues jessi let a gratis, tal lûc internet dal «Crea» (www.crea.gov.it/web/politiche-e-bioeconomia/-/annuario-dell-agricoltura-italiana). Critiche, pal Friûl, e risulte la situazion dal marcjât fondiari. Il numar dai operadôrs biologjics (comprendûts chei de provincie di Triest) al è di 920, cuntune diminuzion dal 8,2%, a pet dal 2018. Impen, i operadôrs regjistrâts tes notis uficiâls de Agriculture sociâl, ch'a jerin 33 vie pal 2019, a son rivâts a 39 vie pal 2020, plaçant la Regjon tal secont puest in Italie.

■ **GRADISCJE IMPERIÂL.** Tesaur soteranis

Tal numar di Dicembar dal so periodic «Sopra e sotto il Carso», i speleoljics gurizans dal Centri di ricercjîs cjarulîns «C. Seppenhofer» a presentin i ultins risultâts dal progjet di esplorazion dai poçs di Gradiscje Imperiâl. Nancje Covid-19 al à fermât i esploradôrs che, ai 19 di Dicembar, a son tornâts tal «Pozzo dei Frari», ch'al permet di jentrâ tun landri naturâl, disot di Campiello Emo, ch'al à funzionât come dipuesit primariûl pal acuedot comunâl insin tai agns dal Sessante. Tor ator, si svilupe une rê di poçs, sgjavâts facilmentri intai stes agns che si faseve sù la fuartece, screade dal 1479. I studis su Gradiscje soteranie a saran proferîts an cu ven, in France, di chê strade dal XVIII «International Congress of Speleology», programât a Le Bourget du Lac, te Savoie.

■ **PADUE.** Il Lusiņ dal Venit

Ance Padue, come Gurize e come il Friûl orientâl, e à il so Lusiņ. Une des plui grandis areis verdis de citât venite si clame «Basso Isonzo» e li e je stade inviate una grande mobilitazion populâr par fermâ un progjet di lotizazion e par realizâ un «Parc agricul». Par finanziâ l'iniziativa, e je stade inviate una campagne di autofinanziament, cul sisteme dal «crowdfunding», ch'è permetarâ di creâ una proprietât coletive, gnove cree, comprant i terens plui menaçâts. Te aree verde, ch'è je part dal Borc «Sacra famiglia» e ch'è a par confin il flum Bacchiglione, a sud-ovest di Padue, a operin bielzà dôs aziendis agriculis biologjichis.

■ **REANE.** Scuclârs cuintri dal incuinament

Ance i fruts de classe II E de Scuele secondarie di Il grât di Reane, guidâts de insegnante Maria Behjat, a figurin fra i protagoniscj dal progjet sul incuinament atmosferic tal bacin padan «PrepAir», finanziât de Union europeane cul programe «Life 2014-2020». La scuele dal Roiâl e à realizât il percors «Salviamo il mondo dall'inquinamento dell'aria», produsint una presentazione e un scandai, destinâts sore il dut pal ambient scolastic. Cui fruts furlans a jerin impegnâts tal progjet scuclârs de Lombardia, dal Piemont, de Provincie di Trent, de Emilia-Romagne e dal Venit. L'iniziativa e larà indevant fintremai tal 2024 (www.lifeprepareu.eu).

Miercus 27	S. Agnule Merici muinie	Domenie 31	S. Zuan Bosco predi
Joibe 28	S. Tomâs di Aquin	Lunis 1	S. Brigjide
Vinars 29	S. Costant vescul	Martars 2	Presentazion dal Signôr
Sabide 30	S. Martine vergjine	Il timp	Ancjemò plois e neveadis.



Il soreli
Ai 27 al iève aes 7.35
e al va a mont aes 17.05.



La lune
Ai 27 Lune plene.

Il proverbi
Lari di nature fin a la muart al dure.

Lis voris dal mès
Se o vês pomârs, gjavait la nêf che e ves
di colâ sui ramaçs.

Colonialism «vert»

L'obietîf «Onu» dal «30x30» al menace 300 milions di Natîfs

«L'idee di «fâ intervencs» sul ambient e scuen jessi bandonade, par dâi la volte a politichis resonadis e confrontadis

fra dutis lis parts interessadis. La partecipazion e pretint che ducj a sedin informâts come cu va sun ogni aspjet, sui pericui e su lis pussibilitâts diferentis. No si à di previodi la partecipazion suntuun progjet dome tal moment de decision iniziâl, dal moment ch'è impliche azions di control e di verifiche continuadis. Tes discussions científichis o politichis, a coventin scletece e veretât, cence fermâsi a considerâ dome ce ch'al è permetût o improibit des leçs... Sul puest ch'a àn di vê chei ch'a vivin dulà che si progjete intervencs di protezion de nature e su la necessitât di «Dialic e trasparenze tai Procès decisionâi» ch'a integnin la difese dal ambient, l'enciliche «Laudato si» e dis peraulis fuartis e claris (n. 183), ispirant intervencs ancjemò plui ingropâts che, par un esempli, Pape Francesc al à fat te esortazion apostoliche «Querida Amazonia». Tal document prontât tal indoman de Sinòde speciâl sul «Polmon vert dal Mont», a vegnin marcâts i dirits dai Popui originariis «al teritori e a la sô demarcazion, a l'autodeterminazion e al consens preliminar» (n. 14). Cuant che s'interven sul teritori – al scrîf Francesc – si à d'intervignî «in mût sostenibil, preservant intune il stîl di vite e i rûts valôrs dai siei abitanti» (n. 51). Ance chescj insegnaments a somein contrastâts e sbeleâts dal Obietîf «30x30», ch'al comparis tal compatât internazionâl «Post-2020 Global Biodiversity Framework» che lis Nazions unidis a son daûr a parecjà, te suaze de «Convenzion su la diversitât biologjiche» («Cbd»). I



Cetantis «Areis protezudis», dopo di vè escomiâts i Popui originariis, i vierzin la puarte al turism massiv (© Survival International)

Dusinte «Ong» a denunziin une politiche pe conservazion de nature tiraniche e colonialiste

guviers e i País ingaiâts te Convenzion a varesin volontât di declarâ «Areis protezudis» il 30% di dute la tiere e di ducj i mârs dal mont, dentri dal 2030. Ma seont 200 organizzazioni mondiâls indipendentis, ch'a cjapin dentri «Survival International», «Slow Food», la Federazion des clapis cristianis di servizi internazionâl «Focsiv», «A Sud», «Amnesty International UK», «European Center for Constitutional and Human Rights», «World Rainforest Movement», «Green Finance Observatory» e vie indevant, chest obietîf al causionarà un malefin catastrofic. Intune declarazion uficiâl spedide al «Onu» e strucade di «Survival Italie» (www.survival.it/notizie/12521), lis «Ong» a pandin che, par solit, lis «Areis protezudis» a deventin «teritoris dulà che si ur improibis di vivi a lis personis ch'a jerin a stâ li di simpri incâ; si ur dinee il dirit di doprâ lis risorsis naturâls necessariis par nudrî lis sôs fameis, di çumâ jerbis di salût par curâsi e di visitâ i lûcs sants». Dapardut atôr pal mont, e denunzie la sezion taliane de organizazion pe difese dai Popui natîfs, lis Comunitâts originariis «a son daûr a lotâ saldo cuintri di chest model di conservazion che impreteribil al scjadene

violazions dai dirits dal om, escomis e robaris di tiere, ch'a tibiin i vuardians de nature plui competents», stant che «tai siei teritoris, al è presint l'80% de biodiversitât, cundut che i Natîfs a son a pene il 5% de popolazion mondiâl». In dite dai Popui originariis, Pranab Doley de Nazion Mising di Kaziranga, in Indie, al à declarât su la cuision: «La storie de conservazion de nature e je maglade de colonizazion. O vin bisugne che la int si unissin cun nô par fâ rivocâ lis nestrîs vôs, parcè che nô o sin batûts, torturâts, sassinâts cu la scuse da la protezion de nature».

Mario Zili

Messe par furlan

La Messe par furlan e ven cjantade ogni sabide a 5 e mieze sore sere (17.30), li de capele de «Puritât», dapruîf dal domo. Sabide ai 30 di Zenâr al cjantarà messe pre B. Baldas. Radio Spazio e trasmet sul moment la liturgjie.

ARLeF e Filologjiche, cors di lenghe furlane online

Noves version pai cors pratics di lenghe furlane inmaneâts de Societât Filologjiche Furlane e sostignûts de ARLeF - Agenzie Regionâl pe Lenghe Furlane. La ativitât formative gratuite, chest an e varâ un aspjet gnûf e impuartant: lis lezionis di alfabetizazion (che a tacaran cui 8 di Fevrâr), destinadis al massim a 90 partecipants, si fasaran dal dut online, su lis plateformis Moodle e Zoom. Al è stât sclârît in ocasion de conference stampe di presentazion là che a son intervignûts l'assessor aes autonomiis locâls de Region Autonome Friûl – Vignesie Julie, Pierpaolo Roberti, Eros Casilino, president de ARLeF e Federico Vicario, president de Societât Filologjiche Furlane (SFF). «Al è impuartant infuârî l'ûs de lenghe

furlane: il cors che ARLeF e Filologjiche a organizin insiem par garantî continuitât ae formazion in marilenghe, ançe in temps di pandemie, al darâ un supuart valit par dâ lis primis basis di gramatiche, par incressi la cognossince e l'ûs de lenghe e par continuâ a coltîvâ la braure di jessi furlans», al à sotlineât l'assessor Roberti. «I crodin une vore a cheste gnove propueste formative, che e aderis in maniere perfete al contest che si cjatîn a vivi – al à precisât il president de ARLeF –. La pandemie e à cambiât dal dut tantis nestrîs abitudins, tacant des modalitâts didatichis tradizionâls. Sielzi di puartâ sul web i cors di furlan nus da la ocasion di slargjâsi a un public simpri plui grant». «Chestis azions a rapresentin l'impegn e la

continuitât di azion che a animin di simpri sedi la Societât Filologjiche Furlane che la ARLeF – al à marcât il president de SFF –. Une colaborazion che intai ultins agns e à cjatât stradis simpri gnovis e miôr par otignî risultâts comuns».

I cors pratics di lenghe furlane a tornin, duncje, cuntune forme gnove e cuntune strutture ancjemò plui articolade, furnint struments simpri plui pratics e utîi ai iscrîts che – se a frecuentaran almancul il 70% des lezionis – a ricevaran un atestât di partecipazion: un titul culturâl par acedi ae liste regionâl dai insegnants cun competencis in lenghe furlane. Pal cors in partence la prime setemane di Fevrâr a son in program 10 lezionis asincronis, su Moodle (ogni setemane al sarâ publicât materiâl gnûf, che al restarâ simpri a disposizion), che a favorissin la riflession, il studi in autonomie e che a rimandin ai trê incuintris sincronis par sclariments e confronts, su Zoom, ognidun di une ore cirche. Pes iscrizioni: 0432 501598 (o scrivint a formazione@filologicafriulana.it).